



STATUT

Sarajevo, juni 2010.

1. OPĆE ODREDBE

Član 1.

Naziv političke stranke je: Savez za bolju budućnost Bosne i Hercegovine (u daljem tekstu: Savez).

Skraćeni naziv je: SBBBiH.

Sjedište Saveza je u Sarajevu.

Član 2.

Savez za bolju budućnost Bosne i Hercegovine je narodna stranka političkog centra otvorena za sve građane Bosne i Hercegovine, čija su načela, ciljevi i organizacija utvrđeni Programom i Statutom.

Član 3.

Savez djeluje na području Bosne i Hercegovine, a u skladu s odgovarajućim propisima i u inozemstvu.

Član 4.

Kao posebni organizacioni oblici u sastavu Saveza djeluju: organizacija asocijacije mladih – Forum mladih, organizacija asocijacije žena – Forum žena, organizacije Saveza u dijaspori ili druge slične organizacije.

Član 5.

Prema strukturi članstva, obezbjeđuje se odgovarajuća zastupljenost mladih i žena u organima i tijelima Saveza, tako da učešće žena bude najmanje do 1/3 (jedna trećina) članova organa, a mladih do 35 godina starosti do 15%.

Član 6.

Savez ima svojstvo pravnog lica.

Član 7.

Savez predstavlja i zastupa Predsjednik Saveza. U slučaju odsutnosti ili spriječenosti Predsjednika, Savez predstavlja i zastupa jedan od potpredsjednika Saveza, prema odluci Predsjednika Saveza.

Član 8.

Savez ima pečat.

Pečat je okruglog oblika s punim nazivom Saveza i znakom u sredini.

Član 9.

Savez ima znak (amblem) i zastavu, čiji se oblik uređuje odlukom nadležnog organa.

2. CILJEVI SAVEZA I NAČIN NJIHOVOG OSTVARIVANJA

Član 10.

U okviru svog političkog djelovanja, Savez će se zalagati za ostvarenje Programa Saveza i svojih ciljeva pridobivanjem birača, učešćem na izborima i učešćem u radu predstavničkih i drugih organa vlasti, srazmjerno svom uspjehu na izborima.

Član 11.

Ciljevi Saveza utvrđeni su Programom, a obuhvataju posebno:

Očuvanje teritorijalnog integriteta i jačanje državnog suvereniteta i nezavisnosti Bosne i Hercegovine; zalaganje za punopravno uključivanje Bosne i Hercegovine u Evropsku uniju, NATO i druge evropske i međunarodne organizacije, te za prestanak izolacije bh. građana; izgradnju Bosne i Hercegovine kao

demokratske i pravne države ravnopravnih građana uz uvažavanje i primjenu temeljnih prava i sloboda čovjeka i građanina, u skladu s međunarodnim konvencijama; osiguranje punih vjerskih sloboda i prava vjerskih zajednica; afirmaciju bosanskohercegovačkog identiteta svih građana BiH; razvijanje prosperitetne tržišne ekonomije na jedinstvenom ekonomskom prostoru Bosne i Hercegovine; zaštitu energetske i drugih resursa BiH; punu zaštitu vlasničkih prava; borbu protiv diskriminacije na nacionalnoj, vjerskoj, socijalnoj, spolnoj i drugoj osnovi; obrazovanje mladih u skladu s evropskim standardima i savremenim potrebama društva; unapređivanje socijalne sigurnosti svih građana, naročito ugroženih kategorija; uspostavljanje odgovarajuće zdravstvene zaštite; poboljšanje penzijske, invalidske i radno-pravne zaštite; očuvanje kulturnog identiteta i kulturne i prirodne baštine BiH; zalaganje za prava Bošnjaka u zemljama Regiona; razvijanje saradnje i jačanje veza s bh. dijasporom; izgradnju međusobno uvažavajućih odnosa s drugim demokratskim državama i međunarodnim organizacijama, prema principima međunarodnog prava i Povelji UN-a; stvaranje društva u kojem će mlade generacije preuzeti odgovornost za sudbinu BiH.

Član 12.

Savez će u ostvarivanju zajedničkih ciljeva sarađivati sa srodnim organizacijama u zemlji i inozemstvu, u skladu sa zakonima, drugim propisima i Statutom. Savez može biti član međunarodnih političkih asocijacija, čije je djelovanje u skladu s Programom Saveza.

Odluku o tome donosi Glavni odbor

Saveza, na prijedlog Predsjedništva.

Član 13.

Rad Saveza i njegovih organa je javan. Izuzetno, organi Saveza svojom odlukom mogu ograničiti ili isključiti javnost, ako za to postoje opravdani razlozi.

3. ČLANSTVO

Član 14.

Članom Saveza može postati svaki punoljetan i poslovno sposoban građanin koji prihvata Program i Statut Saveza, a koji nije član druge političke organizacije. Članom Saveza postaje se potpisivanjem pristupnice.

Član 15.

Član Saveza pripada osnovnoj organizaciji (mjesnom ogranku), prema mjestu prebivališta. Višestruko članstvo nije dopušteno. Evidencija članstva u mjesnim ograncima je baza za uspostavljanje i praćenje jedinstvene centralne evidencije članstva u Savezu (Registar članova). Jedinstveni centralni registar članstva vodi se u stručnim službama Saveza. Članovima Saveza izdaje se članska karta, čiji izgled i sadržaj utvrđuje Predsjedništvo Saveza.

Član 16.

Prava člana Saveza su: da učestvuje u političkom radu Saveza, da odlučuje neposredno ili posredstvom izabranih predstavnika u organima Saveza, da bira i bude biran u organe Saveza, da bude obaviješten o stanju i aktivnostima Saveza, da daje inicijative, prijedloge i mišljenja u vezi s radom Saveza, kao i druga prava koja proizlaze iz prirode članstva.

Član 17.

Dužnosti člana Saveza su: da djeluje u skladu s Programom, Statutom i drugim aktima Saveza, da se aktivno zalaže za ostvarivanje ciljeva Saveza, da provodi odluke organa Saveza i da čuva i unapređuje ugled Saveza.

Član 18.

Članstvo u Savezu prestaje: istupom na vlastiti zahtjev, isključenjem iz Saveza, smrću člana i učlanjenjem u drugu stranku.

4. UNUTRAŠNJA ORGANIZACIJA SAVEZA

Član 19.

Savez djeluje kao jedinstvena politička organizacija na području Bosne i Hercegovine, organizirana na teritorijalnom principu.

Član 20.

Savez se sastoji od:

- mjesnih ogranaka,
- općinskih organizacija,
- kantonalnih i regionalnih organizacija,
- organizacije za Brčko Distrikt BiH,
- organizacije Saveza u dijaspori

Član 21.

Osnovna – temeljna organizacija Saveza je ogranak – Mjesni odbor, a izuzetno općinska organizacija – Općinski odbor, ako općinska organizacija Saveza nema mjesnih ogranaka.

Mjesni ogranak

Član 22.

Mjesni ogranak – odbor obrazuje se za

jedno ili više naselja, a okuplja članstvo koje ima prebivalište na području tih naselja. Na nivou ogranka bira se Mjesni odbor, koji broji 5-15 članova i ima svog predsjednika i potpredsjednika.

Općinska organizacija

Član 23.

Na području općine djeluje općinska organizacija Saveza, koju čine svi mjesni ogranci s područja općine. Općinskoj organizaciji Saveza pripadaju svi članovi Saveza koji imaju prebivalište na području općine.

Član 24.

Općinsku organizaciju Saveza vodi Općinski odbor, koji ima do 70 članova. Odluku o načinu izbora i broju članova donosi Općinska skupština Saveza.

Član 25.

Članove Općinskog odbora Saveza bira Skupština iz reda više kandidata od broja koji se bira. Pri izboru kandidata posebno će se voditi računa o zastupljenosti mladih.

Član 26.

Općinski odbor iz svojih redova, a nakon konstituiranja, bira Izvršni odbor, koji broji 10-15 članova, zavisno od veličine i demografsko-geografske specifičnosti svake pojedine općine.

Član 27.

Predsjednika i potpredsjednike Općinskog odbora Saveza bira Općinski odbor po svom konstituiranju, uz saglasnost Predsjednika Saveza i prethodno pribavljeno mišljenje Kadrovske komisije Saveza.

Član 28.

Članovi Općinskog odbora prema položaju su: predsjednik Foruma mladih, predsjednica Foruma žena i predsjednik Kluba vijećnika.

Član 29.

Zadaci Općinskog odbora Saveza su:

- rasprava o političkim problemima i odlučivanje o političkim pitanjima u okviru svog djelovanja,
- odgovornost za provođenje politike Saveza na području općine,
- imenovanje stalnih i privremenih tijela za pojedine oblasti,
- sudjelovanje u predlaganju kandidata za organe i tijela Saveza,
- provođenje odluka i akata viših organa Saveza,
- bavljenje i svim drugim pitanjima stranačke politike u skladu s Programom i Statutom Saveza.

Član 30.

Općinski odbor Saveza djeluje prema poslovniku koji donosi Općinska skupština Saveza, a u skladu sa Statutom.

Kantonalna i regionalna organizacija Saveza

Član 31.

Na području kantona, odnosno regije, djeluje kantonalna, odnosno regionalna organizacija Saveza, koju čine sve općinske organizacije Saveza s područja kantona, odnosno regije.

Član 32.

Za područje kantona, odnosno regije, formira se Kantonalni, odnosno Region-

alni odbor Saveza. U Kantonalni, odnosno Regionalni odbor Saveza svaki općinski odbor Saveza bira jednog ili više članova, zavisno od veličine te organizacije, s tim što predsjednik općinske organizacije Saveza, prema položaju, ulazi u sastav Kantonalnog, odnosno Regionalnog odbora Saveza.

Broj članova koji se biraju iz pojedinih općinskih organizacija utvrđuje se odlukom Predsjedništva, na prijedlog Kantonalnog, odnosno Regionalnog odbora Saveza.

Član 33.

Kantonalni, odnosno Regionalni odbor iz svog sastava bira predsjednika i sekretara, a prema potrebi jednog ili više potpredsjednika, uz saglasnost Predsjednika Saveza i prethodno pribavljeno mišljenje Kadrovske komisije Saveza.

Član 34.

Članovi koji prema položaju ulaze u sastav Kantonalnog, odnosno Regionalnog odbora su: predsjednik kluba poslanika u zakonodavnom tijelu kantona, odnosno odgovarajućem tijelu regije, predsjednik Foruma mladih i predsjednica Foruma žena.

Kantonalni, odnosno Regionalni odbor razmatra društveno-političke prilike na području kantona, odnosno regije, utvrđuje politiku, usmjerava i koordinira rad općinskih organizacija Saveza na svom području, provodi odluke i akte viših organa Saveza.

Odluke Kantonalnog, odnosno Regionalnog odbora obavezne su za članstvo i općinske organizacije na svom području.

Organizacija Saveza za Brčko Distrikt Bosne i Hercegovine

Član 35.

Za područje Brčko Distrikta Bosne i Hercegovine organizira se posebna organizacija Saveza. Na organizaciju Saveza za Brčko Distrikt Bosne i Hercegovine (ovlaštenja, odgovornosti i odnosi s centralnim organima Saveza) shodno se primjenjuju odredbe ovog Statuta koje se odnose na općinske i kantonalne, odnosno regionalne organizacije Saveza.

Organizacije Saveza u dijaspori

Član 36.

S ciljem efikasnog ostvarivanja programskih ciljeva Saveza, a vodeći računa o slobodi političkog izbora svih građana BiH, uključujući i građane BiH koji žive van granica Bosne i Hercegovine, Savez će organizirati posebne organizacijske jedinice – ogranke Saveza u dijaspori.

Glavni odbor Saveza će, na prijedlog Predsjedništva Saveza, a na inicijativu građana BiH u dijaspori, donijeti odluku o organizacionim jedinicama – ograncima Saveza u dijaspori.

Klubovi Saveza

Član 37.

Radi uspješnijeg ostvarivanja programskih ciljeva Saveza u zakonodavnim tijelima na nivoima općine, grada, kantona, regije, entiteta i države organiziraju se klubovi vijećnika, poslanika, delegata na funkcionalnom principu. Odlukom Predsjedništva Saveza bliže se uređuju organiziranje i rad klubova u okviru Saveza.

Član 38.

Odluke i stavovi klubova obavezuju članove klubova u predstavničkim tijelima. Nepoštivanje odluka i stavova kluba podliježe odgovornosti.

Stručne službe Saveza

Član 39.

Za obavljanje administrativnih, materijalno-tehničkih i finansijskih, te drugih stručnih poslova u Savezu, organiziraju se stručne službe Saveza.

Član 40.

Stručnim službama Saveza rukovodi izvršni sekretar, koji organizira i koordinira rad stručnih službi i odgovoran je za njihov rad.

Član 41.

Izvršni sekretar uspostavlja unutrašnju organizaciju stručnih službi na nižim nivoima, prema prethodno pribavljenom mišljenju njihovih izvršnih organa.

Član 42.

Organizacija i rad stručnih službi Saveza uređuju se posebnim pravilnikom koji donosi Predsjedništvo Saveza.

5. ORGANI I RADNA TIJELA SAVEZA

Član 43.

Organi Saveza su:

- Kongres,
- Konvencija,
- Glavni odbor,
- Predsjednik,

- Predsjedništvo,
- Nadzorni odbor i
- Sud časti.

Kongres Saveza

Član 44.

Najviši organ Saveza je Kongres. Delegati Kongresa biraju se u općinskim, kantonalnim/regionalnim organizacijama i iz reda članova organizacije Saveza u inozemstvu (ako je formirana). Određeni broj delegata Kongresa bira se prema položaju, a jedan broj delegata imenuje Predsjednik Saveza.

Prema položaju, delegati Kongresa su: Predsjednik Saveza, članovi Predsjedništva Saveza, članovi Glavnog odbora Saveza, Nadzornog odbora i Suda časti.

Predsjednik Saveza imenuje 5% delegata u odnosu na ukupan broj delegata na Kongresu. Broj, način izbora i kriterije za izbor delegata Kongresa utvrđuje Glavni odbor Saveza svojom odlukom. Prema položaju, delegati Kongresa mogu biti i svi poslanici i delegati u državnim i entitetskim zakonodavnim tijelima.

Član 45.

Nadležnosti Kongresa Saveza su: usvaja Program Saveza, usvaja Statut Saveza, razmatra i ocjenjuje rad Saveza između dva kongresa, bira Predsjednika Saveza, Glavni odbor Saveza, Nadzorni odbor, Sud časti i donosi druge akte općeg karaktera.

Član 46.

Program i Statut Saveza, kao i njihove izmjene i dopune, donose se dvotrećinskom većinom prisutnih delegata Kongresa.

Član 47.

Kongres može biti redovni i vanredni. Redovni Kongres održava se svake 4 (četiri) godine, a zavisno od potreba može se sazvati i ranije (vanredni Kongres). Odluku o sazivanju Kongresa donosi Glavni odbor. Inicijativu za sazivanje vanrednog Kongresa donosi najmanje 1/3 (jedna trećina) općinskih organizacija Saveza, 1/3 kantonalnih/regionalnih organizacija Saveza te 1/3 članova Glavnog odbora. Za odluke općinskih, kantonalnih/regionalnih organizacija Saveza iz prethodnog stava, dovoljna je odluka izvršnih organa tih organizacija.

Konvencija Saveza

Član 48.

Konvencija se saziva zbog posebnih okolnosti ili u vanrednim prilikama, kada nije moguće održati Kongres Saveza.

Konvencija se može sazvati i u slučaju kada Predsjedništvo i Predsjednik Saveza ocijene da s politikom i ciljevima stranke, aktuelnom situacijom u zemlji ili šire, treba upoznati organe Saveza ili predstavnike nižih nivoa Saveza. Predsjedništvo Saveza svojom odlukom utvrđuje strukturu članova Konvencije.

Član 49.

Konvenciju saziva Predsjednik Saveza, na osnovu odluke Predsjedništva Saveza, a u slučaju iz stava 2. prethodnog člana, Konvenciju saziva Predsjednik Saveza, pri čemu nije potrebna prethodna odluka Predsjedništva Saveza. Konvencija ima sva ovlaštenja Kongresa, kao i druga ovlaštenja utvrđena Statutom Saveza.

Član 50.

Odluke Konvencije donose se većinom glasova, kao što se odlučuje i na Kongresu Saveza, a imaju snagu kongresnih odluka.

Glavni odbor

Član 51.

Glavni odbor je najviše političko tijelo Saveza između dva zasjedanja Kongresa. Glavni odbor ukupno broji 142 (stotinu četrdeset dva) člana.

Član 52.

Kongres Saveza bira 85 (osamdeset pet) članova Glavnog odbora, vodeći računa da se pri kandidiranju i izboru članova Glavnog odbora osigura srazmjerna zastupljenost kantonalnih/regionalnih organizacija Saveza (u okviru toga općinskih organizacija). Na prijedlog asocijacije mladih bira se 5 (pet) članova i asocijacije žena Saveza bira se 5 (pet) članova Glavnog odbora, uz saglasnost Predsjednika Saveza. Predsjednici kantonalnih/regionalnih odbora Saveza i predsjednik Saveza za Brčko Distrikt Bosne i Hercegovine su, prema položaju, članovi Glavnog odbora.

Član 53.

Glavni odbor iz svog sastava bira predsjednika i zamjenika predsjednika Glavnog odbora.

Član 54.

Glavni odbor zasjeda prema potrebi, najmanje jednom u tri mjeseca. Predsjednik Glavnog odbora obavezno će sazvati sjednicu Glavnog odbora ako to

zatraži Predsjedništvo Saveza, Predsjednik Saveza ili 1/5 (jedna petina) članova Glavnog odbora.

Član 55.

Nadležnosti Glavnog odbora su: utvrđuje prijedloge dokumenata i drugih akata (Program, Statut, rezolucije, deklaracije, odluke itd.) koje donosi Kongres, donosi odluke od posebnog značaja između dva kongresa, brine se o provođenju odluka, odnosno drugih akata Kongresa i Konvencije Saveza, bira i razrješava Predsjedništvo i druge organe i funkcionere Saveza, u skladu sa Statutom, imenuje odbore, komisije i savjete iz svoje nadležnosti, razmatra i usvaja izvještaje o finansijskom poslovanju Saveza, razmatra i donosi godišnji finansijski plan Saveza, obavlja i sve druge poslove u skladu sa Statutom.

Predsjednik Saveza

Član 56.

Predsjednik Saveza je politički i izvršni organ Saveza.

Predsjednik Saveza:

- predstavlja i zastupa Savez,
- predlaže i provodi politiku Saveza,
- saziva Predsjedništvo Saveza i učestvuje u njegovom radu, kao i u radu Glavnog odbora s pravom glasa,
- koordinira i nadzire funkcioniranje ukupne organizacije rada Saveza,
- Glavnom odboru predlaže kandidate za potpredsjednike i članove Predsjedništva Saveza u konsultaciji s Kadrovskom komisijom Saveza,
- predlaže kandidata za generalnog sekretara Saveza,

- podnosi izvještaj o svom radu Glavnom odboru i Kongresu Saveza,
- imenuje, prema potrebi, svoje savjetnike za pojedine oblasti i portparola Saveza,
- potvrđuje izborne liste za zakonodavne organe vlasti za sve nivoe u Bosni i Hercegovini,
- izuzetno, ima pravo donijeti odluku o raspuštanju Općinskog,

Kantonalnog/Regionalnog odbora, ako je došlo do težeg narušavanja

Programa i Statuta Saveza, o čemu obavještava Predsjedništvo i pokreće se neophodna procedura, u skladu sa Statutom,

- može udaljiti s dužnosti predsjednika Općinskog, Kantonalnog/Regionalnog odbora čije djelovanje nije u skladu s djelovanjem, ugledom, politikom i ciljevima Saveza, o čemu obavještava Predsjedništvo, radi daljeg postupanja,
- rukovodi radom Predsjedništva Saveza,
- može ovlastiti jednog od potpredsjednika Saveza da saziva i vodi sjednice Predsjedništva,
- u slučajevima nemogućnosti sazivanja Predsjedništva Saveza, može donositi odluke iz nadležnosti Predsjedništva Saveza, koje taj organ naknadno verificira.

S ciljem zadovoljavanja nacionalne, spolne, starosne, profesionalne i teritorijalne zastupljenosti, Predsjednik Saveza može donijeti odluku o dopunjavanju određenog broja članova u svim organima Saveza, a najviše do $\frac{1}{4}$ (jedne četvrtine) od ukupnog broja članova pojedinih organa.

Predsjedništvo Saveza

Član 57.

Predsjedništvo Saveza je izvršnopolitički organ Saveza koji broji 23 člana.

Članovi Predsjedništva prema položaju su: potpredsjednici Saveza, generalni sekretar, i predsjednik Glavnog odbora.

Ostali članovi Predsjedništva biraju se na prijedlog Predsjednika Saveza utvrđen u konsultaciji s Kadrovskom komisijom Saveza.

Član 58.

Predsjedništvo Saveza:

- izvršava odluke i provodi stavove Kongresa, Konvencije i Glavnog odbora Saveza,
- utvrđuje nacрте dokumenata i odluka koje donesu Kongres, Konvencija i Glavni odbor u okviru svojih nadležnosti,
- provodi političke aktivnosti u okviru Programa Saveza,
- prati realizaciju finansijskog plana,
- donosi Pravilnik o organizaciji stručnih službi Saveza, Pravilnik o materijalno-finansijskom poslovanju i druge opće akte Saveza, u skladu sa Statutom,
- ima i druge nadležnosti utvrđene Statutom i drugim općim aktima.

Član 59.

Članovi Predsjedništva preuzimaju zaduženja po pojedinim oblastima i odgovorni su za praćenje i predlaganje politike Saveza u toj oblasti.

Odluku o zaduženju donosi Predsjedništvo na prijedlog Predsjednika Saveza.

Potpredsjednici Saveza

Član 60.

Savez ima 5 (pet) potpredsjednika. Potpredsjednici Saveza biraju se na prijedlog Predsjednika Saveza, utvrđen u konsultaciji s Kadrovskom komisijom.

Član 61.

Potpredsjednici Saveza zadužuju se za određena pitanja u Savezu.

Predsjedništvo Saveza će odlukom odrediti zaduženja potpredsjednika Saveza na prijedlog Predsjednika Saveza.

Generalni sekretar Saveza

Član 62.

Savez ima generalnog sekretara kojeg, na prijedlog Predsjednika Saveza, bira Glavni odbor. Generalni sekretar Saveza pomaže Predsjedniku Saveza, potpredsjednicima te predsjedniku i zamjeniku predsjednika Glavnog odbora u organizaciji i koordinaciji njihovog rada, rukovodi radom izvršnih sekretara i stara se za organizaciono funkcioniranje Saveza, te ima druga ovlaštenja i odgovornosti utvrđene ovim Statutom, kao i ostalo što će precizirati Predsjedništvo Saveza.

Za pojedine oblasti rada u Savezu imenuju se izvršni sekretari. Izvršne sekretare imenuje Predsjedništvo Saveza.

Kadrovska i druge komisije Saveza

Član 63.

Kadrovsku komisiju imenuje Predsjedništvo Saveza na prijedlog Predsjednika. Kadrovska komisija broji 7 (sedam) članova.

Članovi Kadrovske komisije mogu se birati iz reda Predsjedništva Saveza, Glavnog odbora ili iz reda drugih istaknutih članova Saveza.

Član 64.

Kadrovska komisija Saveza stara se o kadrovima Saveza, njihovom pravilnom usmjeravanju i rasporedu, te predlaže i prati provođenje kadrovske politike Saveza.

Član 65.

Predsjedništvo Saveza može imenovati i druge komisije zavisno od potrebe, kao što su komisija za opće akte, komisija za međunarodnu saradnju, komisija za dijasporu, a može obrazovati i druge komisije.

Nadzorni odbor Saveza

Član 66.

Nadzorni odbor zadužen je za nadziranje materijalno-finansijskog poslovanja Saveza u cjelini i svih njegovih organizacionih dijelova.

Nadzorni odbor postupa po svojoj inicijativi ili na zahtjev Glavnog odbora, Predsjedništva ili Predsjednika Saveza. Sastoji se od predsjednika, zamjenika predsjednika i 3 (tri) člana.

Nadzorni odbor podnosi izvještaj o materijalno-finansijskom poslovanju Saveza Glavnom odboru jednom godišnje, a Kongresu Saveza podnosi zbirni izvještaj za četverogodišnji period.

Član 67.

Za područje općinskih, gradskih i kantonalnih/regionalnih organizacija imenuje se komisija za materijalno-finansijsko

poslovanje (Finansijska komisija). Finansijska komisija broji 3-5 članova, a imenuju je Općinski i Kantonalni/Regionalni odbor i ona ima zadatak da nadzire materijalno-finansijsko poslovanje Saveza na svom području.

Sud časti

Član 68.

Sud časti rješava žalbe na odluke o izricanju mjera odgovornosti, kao i druge slučajeve u skladu sa Statutom. Sastoji se od predsjednika Suda, zamjenika predsjednika i 9 (devet) članova. Radi u Vijeću od 3 (tri) člana, uključujući i predsjednika Vijeća. Sastav Vijeća za svaki slučaj određuje predsjednik Suda časti. U postupku pred Sudom časti shodno će se primijeniti odredbe općih propisa, koje reguliraju utvrđivanje odgovornosti (npr. disciplinski postupak i sl.).

Savjeti Saveza

Član 69.

Savez može formirati savjete Saveza, kao savjetodavna tijela za proučavanje i razmatranje općih i posebnih pitanja te davanje mišljenja i preporuka organima Saveza. Predsjednika i članove savjeta imenuje Glavni odbor, i to iz reda javnih ili kulturnih radnika te istaknutih stručnjaka iz reda članova Saveza. Prema potrebi, za pojedina pitanja, savjet Saveza može formirati i Predsjedništvo na prijedlog Predsjednika Saveza.

6. IZBORI I RAD ORGANA SAVEZA

Član 70.

Izbori u Savezu mogu biti redovni i

vanredni. Redovni izbori za sve organe Saveza održavaju se svake četvrte godine.

Prije održavanja redovnog Kongresa Saveza provode se izbori za sve organe, od mjesnih ogranaka naviše. Vanredni izbori provode se ako se okolnosti i stanje u Savezu ili pojedinim njegovim organizacionim dijelovima ne mogu riješiti na drugi način prije isteka mandata.

Član 71.

Izbori za sve organe i funkcionere u Savezu provode se tajnim glasanjem između više kandidata. Pravila izbornog postupka u Savezu donosi Glavni odbor. Pravilima se može predvidjeti da se za neke organe glasa javno.

Član 72.

Svi kandidati za organe i funkcije u Savezu moraju uživati ugled u sredini gdje žive i rade i ispoljavati odanost programskim ciljevima i načelima Saveza. Pravilnikom o ostvarivanju kadrovske politike u Savezu bliže će biti definirano u kojim slučajevima mišljenje i saglasnosti daje Kadrovska komisija, a u kojim drugi organi Saveza. Pravilnik iz prethodnog stava donosi Predsjedništvo Saveza.

Član 73.

Svi članovi organa Saveza i svi izabrani nosioci funkcija u njoj odgovaraju za svoj rad i mogu biti opozvani, odnosno razriješeni. Opoziv se vrši po istom postupku kao i izbor. Pravilima izbornog postupka bliže će se regulirati opoziv i provjera povjerenja u Savezu.

Član 74.

Članovima Saveza koji djeluju suprotno Programu, Statutu i drugim općim aktima

Saveza i time bitno narušavaju ugled ili nanose štetu Savezu, mogu se izreći mjere odgovornosti: javni ukor, ukor pred isključenje iz Saveza, isključenje iz Saveza. Postupak utvrđivanja odgovornosti je hitan, a provode ga odgovarajući organi u skladu sa Statutom.

Član 75.

Ako bi dalji rad i prisustvo u organima Saveza, člana protiv kojeg je pokrenut postupak odgovornosti u Savezu, mogli nanijeti štetu Savezu, može mu se i prije okončanja postupka izreći suspenzija (udaljenje iz organa), koja vrijedi do donošenja konačne odluke.

Član 76.

Odluke organa Saveza obavezne su za članstvo Saveza. Odluke organa višeg nivoa organiziranja Saveza obavezne su za organe Saveza nižeg nivoa organiziranja.

Član 77.

Mandat izabranih organa Saveza traje četiri godine. Broj mandata na kojem mogu biti

izabrani predsjednici organa Saveza na svim nivoima može se ograničiti. Odluku o tome donosi Predsjedništvo Saveza, na prijedlog Kadrovske komisije.

Prije svakih redovnih izbora u Savezu, Predsjedništvo će obavezno razmotriti ovo pitanje i zauzeti stav o tome.

Član 78.

Svaki organ Saveza može zasjedati i odlučivati kada je na sjednici prisutno više od polovine ukupnog broja njegovih članova. Odluke se donose većinom prisutnih članova, ako Statutom ili drugim općim aktom nije drugačije

određeno.

Član 79.

Svi organi Saveza, i na svim nivoima, donijet će poslovničke o radu, u kojima će, u skladu s ovim Statutom, urediti pravila svog rada.

Član 80.

Predsjednik Saveza ima pravo zaustaviti izvršenje odluke ili drugog akta organa Saveza na nižim nivoima, te odluke nosilaca funkcija u organima Saveza, za koje smatra da su u suprotnosti s Programom, Statutom i drugim odlukama organa Saveza, čija bi primjena nanijela štetu ugledu ili drugu štetu Savezu.

U ovim slučajevima, Predsjednik je dužan, bez odgađanja, izvijestiti Predsjedništvo Saveza, koje je odluku o tome dužno donijeti u roku od 30 dana od dana prijema obavijesti.

Član 81.

Predsjedništvo Saveza ima pravo razriješiti Kantonalni/Regionalni, Općinski, odnosno Mjesni odbor u cjelini, kao i pojedine njihove članove, ako ocijeni da djeluju u suprotnosti s Programom, Statutom i drugim odlukama organa Saveza i time ugrožavaju ugled i nanose drugu štetu Savezu. Kada razriješiti neki odbor u cjelini, Predsjedništvo će imenovati povjerenika ili povjereništvo koje će voditi poslove razriješenog organa do novog izbora. Protiv ovih odluka može se podnijeti žalba Glavnom odboru u roku od 15 dana. Žalba ne odgađa izvršenje.

Član 82.

Za povjerenika ili člana povjereništva iz prethodnog člana, izuzetno se može

imenovati i član Saveza koji organizaciono ne pripada organizaciji za koju se povjerenik ili povjereništvo imenuje.

7. MATERIJALNO-FINANSIJSKO POSLOVANJE

Član 83.

Savez ostvaruje prihode od: članarine, dotacija iz budžeta, prihoda od imovine u vlasništvu Saveza, organiziranja različitih priredbi, dobrovoljnih priloga pravnih i fizičkih lica i na drugi Zakonom dozvoljen način.

Član 84.

Finansijsko poslovanje Saveza obavlja se putem transakcijskih računa i blagajne. Primitak i izdatak sredstava može se izvršiti samo na osnovu urednih pisanih naloga. Finansijsko poslovanje Saveza uređuje se posebnim pravilima.

Član 85.

Niže organizacione jedinice Saveza mogu stvarati obaveze u pravnom prometu s trećim licima, samo u okviru finansijskog plana odobrenog od Predsjedništva Saveza i u skladu s važećim propisima.

Član 86.

Savez može, radi ostvarivanja dobiti, u skladu sa Zakonom, osnivati privredna društva i druge organizacije. Odluku o osnivanju društva donosi Predsjedništvo Saveza.

8. PRESTANAK RADA SAVEZA

Član 87.

Savez će prestati s radom ako to odluči Kongres. Za tu odluku potrebna je dvotrećinska većina glasova prisutnih

članova Kongresa. U slučaju da se Kongres ne može sastati, odluku o prestanku rada Saveza može donijeti Konvencija, dvotrećinskom većinom svih članova Konvencije, tajnim glasanjem.

9. PRIJELAZNE I ZAVRŠNE ODREDBE

Član 88.

Izmjene i dopune Statuta Saveza vrše se prema proceduri propisanoj za njegovo donošenje.

Član 89.

U posebnim okolnostima, odnosno ukoliko se ukaže potreba, s ciljem održavanja kontinuiteta efikasnog funkcioniranja Saveza, Predsjednik Saveza može Glavnom odboru predložiti izmjene i dopune Statuta u periodu između dva Kongresa Saveza.

Glavni odbor donosi konačnu odluku o izmjenama i dopunama Statuta, uz obavezu da se konačna verifikacija Statuta izvrši na konvenciji ili prvom narednom Kongresu Saveza.

Član 90.

Autentično tumačenje Statuta daje Glavni odbor Saveza na prijedlog Komisije za opće akte, a tumačenje drugih općih akata Saveza daje organ koji ih je donio, također na prijedlog Komisije za opće akte.

Član 91.

Ovaj Statut stupa na snagu danom donošenja.

Član 92.

Svi organi Saveza usaglasit će svoju organizaciju s odredbama ovog Statuta, u roku od tri mjeseca od njegovog stupanja na snagu.

